



# Synfocity = 513

mail us at : [mzsynfo@gmail.com](mailto:mzsynfo@gmail.com); [mizoramsynod@gmail.com](mailto:mizoramsynod@gmail.com) - Phone - 2314648

13<sup>th</sup> November, 2014

- **SEC vawi 252-na a thu**  
 Ni thum chung awh tur Synod Executive Committee vawi 252-na chu November 11, 2014 atang khan Synod Office-a JM. Lloyd Hall-ah an thu a. Committee hi Rev. K. Lalmuchhuaka, Synod Moderator-in a kaihruai a, tun tum Committee hian thu pawimawh ngaihtuah tur 70 chuang zet an nei.  
 Thu ngaihtuah tur chhawp chhuah zingah hian Zokhawthara Transit Accomodation siam rawtna te, MLPC Act chungchanga hma lak zel dan tur te, Council of Churches in Mizoram din thu te, Sacramental wine chungchang te, Ramthar Commission leh rawngbawlina thlir ho te, MSSU Inkaihruaina siamthat, Kohhran programme-a naupang tel tam dan tur, Bookroom Headquarters building sak that chungchang, Pastoral Ministry Kaihruaina policy te, RC & RL pek theih chin kum bituk thitlem rawtna te leh District capital hrang hranga Counselling Centre din rawtna te chu a langsar zual an ni.  
 Synod hnuai Lay worker kum 2015-a pension-a chhuak tur mi 19 te dinhmun leh kum 2016-a chhuak tur mi 5-te dinhmun thlir ho a ni a, Ramthar field hrang hranga hmunhna thar benbel mek leh ram lei belh tul te, in sak thar ngai chungchang te sawi ho a ni ang a, Presbyterian English School Manual en that te, Synod Hospital hmanraw mamawh langsar zual leh bawhzui dan tur te sawi a ni ang. Presbytery hrang hrang atanga thu lut 18 leh Synod hnuai Board hrang hrang atanga thu lut thahnem tak ngaihtuah tur a awm bawk.  
 Secretary reports-ah kumin chhunga Synod hnuai rawngbawlina peng hrang hrang hmalakna pawimawhte tar lan a ni a, chung zingah chuan Zu khap burna Dan hlih duh lohna lantira ram pum huapa Kohhranin ke a pen thu te, chuti chunga sawrkarin Dan thar a siam hnan tak dan te leh zu chungchanga Kohhran dinna inzirtir nan Kohhran tinah lehkhia thawn chhuah a nih thu te, ramri hrula chengte dinhmun en fiah tura Synod 2013-in thu a lo dah tawh bawhzuia OM member-ten Cachar ramri hrula chengte dinhmun a hmuna an enfiah dan leh heng mite himna atana a khat tawka Out Post dah tura sawrkar an ngen thu te chu ram inrelbawlina khawih thila hmalakna langsar an ni.  
 Ram pawna Synod hmalaknaah Synod Moderator hova Zaipawl-ten Wales ram Kohhran an tlawh thu tar lan a ni a, Synod Hospital-ah Medicine Specialist thar tha tak leh thisen thliarna khawl thar neih a nih thu leh contract Missionary kum 2015 atanga bung tan tur mi 119 lak thar an nih thu leh Orientation neihpui mek an nih thu tar lan a ni bawk.  
 Synod sum dinhmun tar lan a ni a, Pastoral Budget Nuai sangriat za sawmruk pakhat singnga sangthum-ah October thla thlengin Nuai sangli zanga sawmli pathum singruk sangsarih sawmkua pariat hmuh tawh a ni a, chu chu za zela 55.67 a ni. Mission Budget Nuai sangnga za sawmriat pakua singnga sangkhatah October thla thlenga hmuh tawh chu Nuai sangthum zali sawmruk pakua singthum sangruk zasarih sawmnga paruk a ni a, chu chu za zela 66.85 a ni.  
 Synod Budget pum pui Vaibelchhe za sawmthum pathum nuai sawmnga pakhat leh sangli atangin hmuh tawh zat chu Nuai sangriat sawmpathum sangthum zariat sawmnga pali a ni a, chu chu Budget atangin za zela 60.02 a ni. Kum 2014 June thla atanga October thla chungin Synod Relief Fund atangin Damlo rethei mi 38, Rethei leh rualbanlo mi 34, Tuilian vanga thi mi 2, Lei min tuar mi 15, Thlipui tuar mi 23, Kangmei tuar mi 26 leh thil danga harsatna tawk mi 35 hnenah tanpuina sum pek a ni.  
 SEC hi ruahman lawk ang chuan November 13, 2014 (Ningani) thlenga thu tur an ni a, thurel an zawh hman loh chuan a hun hi pawhsei theih a ni ang.
- **Pastor-te tan Counselling Training**  
 Mizoram Synod, Family Guidance & Counselling Centre-in Pastor nemnggeh tharte puala Pastoral Care & Counselling Training vawi 24-na, Synod Conference Centre-a a buatsaih chu nizan (Nov. 12, 2014) khan Rev. Lalramliana Pachuau, Executive Secretary i/c FG&CC-in a hawng. He Counselling training-ah hian kum 2012-a Pastor nemnggeh mi 17 an lut a, November 26, 2014 ah training an zo ang.  
 Counselling Training hawna inkhawm hi Rev. R. Lalmingthanga, Director, FG&CC in a kaihruai a, ani hian inhmelhriattirna leh FG&CC rawngbawlina report a pe nghal bawk. Training hawngtu Rev. Lalramliana Pachuau chuan thu sawiin, "Tunlai khawvel hmasawn leh thang zelah Pastoral Care & Counselling Training chu a pawimawh tulh tulh dawn a ni," a ti a. Midangte ngaihsaktu nih a pawimawh thu te, midangte harsatna sutkianpui tura thuruk vawng thei mi nih a pawimawh thu te sawiin, tunlai khawvel hmasawna Social Media te pawh rawngbawlina atana hman tangkai thiam turin trainee te chu a chah bawk.  
 FG&CC Director report atanga a lan danin Family Guidance & Counselling Centre (FG&CC) hian tunah hian Counselling Centre pali an nei a, client an neih tawh zawng zawng hi mi 10,931 niin, kumin 2014 -ah hian client 2,271 an nei tawh a ni.
- **Kohler Hruaina Eng Quiz Top 20**  
 Synod Information & Publicity (Synfo) buatsaih Kohler Power Systems Hruaina Eng Quiz neih mekah November 13 & 14, 2014 hian Top 20 round inelna neih chhonzawm leh tur a ni a, inel turte chu :  
**November 13, 2014 (7:30 p.m.) @ Zosaphluia Hall, Mission Veng**  
*ITI Vengchhak Branch, Model Veng Branch, Zarkawt Branch, Chandmari West Hmar Veng Branch & Ramhlun Venglai Branch*  
**November 14, 2014 (7:30 p.m.) @ Zosaphluia Hall, Mission Veng**  
*Khatla Branch, Mission Vengthlang Branch, Zonuam Branch, Bawngkawn Branch & Sakawrtuichhun Branch*  
 Top 20 Round-ah hian Rapid Fire Round te, Visual Round (G.K.) te, Audio Round (KTP) te a awm tawh a, in lama Branch member te lo chhan ve tur zawhna pahnih Isaia Bu atangin siam thin a ni bawk.  
 Kohler Power Systems Hruaina Eng Quiz hi show neih apiangin Hruaina Eng Channel (LPS & Zonet Cable TV)-ah Live in pekchhuah thin a ni.
- **Zin**

  - ♦ November 13 - 16, 2014 hian Ngopa Bialah Literature Seminar neih a ni dawn a, hemi neihpui tur hian Rev. K. Lalpiangthara, SL&PB Editor; Upa H. Ronghaka, SL&PB Jt. Editor; Upa Lalrammawia Ngente leh Pu Lalniliana, Synod Bookroom Manager te an kal ang.
  - ♦ November 15 - 17, 2014 chung hian Kawlkulh, Champhai Zotlang leh Champhai Vengthlang Presbyterian English School tlawh turin Upa D.P. Biakkhuma, Supervisor of Schools a kal ang.

☐ **Synod Mission Board**

- ◆ November 10 - 28, 2014 chung awh tur Missionary Orientation Training chu November 10, 29014 atang khan Mission Veng Kohhran Hall-ah neih tan a ni.  
Training hi Synod Mission Board-in kum 2015 chung missionary (Evangelist, Evangelist Teacher, Staff Nurse, Health Worker, Craft Teacher, Office Assistant) tur mi 119 a lak tharte puala neih a ni.  
Training-ah hian rawngbawlna kawnga tangkai tur thil chi hrang hrang zirtir an ni dawn a, Subject Orientation, SMB Office Matters, Missionary Life, Intro to Xn Faith, Communication, Intro to the Bible, Major Religions, Missionary as a Teacher, Cross Culture (Prac. Issues), Inter. Relationship, Church Planting, Mission & Culture, Introduction to SMB, Call & Commitment, Missionary as a Communicator, Language Learning Skill, Presbyterian Church, Challenges in Missionary Life, Personal Management, Health Care & First Aid, Mental Health Awareness, Accounting leh Manners & Etiquette te zirtir an ni ang.
- ◆ November 10, 2014 zing dar 6:50 khan Pu T Vanlalruata, Headmaster SHMS Damdep-I chu kal thalo leh thinlian avangin Aizawl Civil Hospital ah a thi a, hemi ni vek hian an chenna in, Ramhlun Vengthlang-ah Rev. Lalchuanmawia, Synod Mission Board Secretary-in a vui a ni.  
Pu T. Vanlalruata hi Pu Lalbiakthuama (L) leh Pi Lahmuaki te da 10 zinga a naupang ber a ni a. February 19, 1990 atangin Synod Mission Board hnuaiah Evangelist Teacher hna a thawk tan a, June 1, 2005-ah Permanent-a dah a ni. A rawngbawl chung hian hmun hrang hrangah awm kual tawhin Kawrthindeng, Bungtlang South, Tlabung, Zawlpui leh Damdep-I ah te a lo thawk tawh a, DIET leh Missionary Training College (MTC) ah te training a nei tawh bawk. Damdep-I ah hian March 2012 atanga a thih ni thlengin Headmaster hna a thawk a ni.  
Pu T. Vanlalruata hian a nupui Pi Vanlalbiai, Evangelist Teacher leh a fate 4 a kalsan a ni.
- ◆ November 4 - 6, 2014 khan Siliguri Mission Field chuan Simulguri, Siliguri-ah campaign lian tham tak an nei a, mi 500 bawr velin an chhim a, speaker atan Rev. Dr. Sanjeep Sharma an hmang. Medical free clinic neih nghal a ni a, indan ngai khawpin mipuiin an hlut a ni.
- ◆ November 7 - 9, 2014 khan Chhimbial Masihi Sangati Convention, Lawngtlai Bazar Kohhranah neih a ni a, speaker atan Pu R. Lalchhanhima, Synod Office an hmang. Speaker hi Pu K. Lalankima, Tuikual; NI. Lancy Remialhruaii leh Tv. Zosangzuala Chhangte (Soloists) ten a tawiam a ni. Convention-ah hian ringthar mi 40 laiin baptisma an chang a ni.
- ◆ November 7 - 9, 2014 khan Mamit Kohhranah Home Mission North Missionary Retreat vawi 4-na neih a ni a. Missionary 171 leh an kawppuite nen mi 200 velin he hun hi hlawk takin an hmang. Upa Dr. LN Tluanga, Mission Veng chu speaker niin Retreat thupuih 'Ka thlarau zawkin le' tih hman a ni. Rev. F. Lalrammawia i/c Tuipuibari Pastor Bial leh Upa Lalhriata-te thuziak (paper) zir ho a ni a, thawktuten an hlawkpui hle.
- ◆ November 7 - 9, 2014 khan Damparengpui-ah a vawi khatna atan Bru pual Inkhawmpui hun hman a ni a, Pastor C. Zoramawia, Dawrpui Bialtu chu Thuhrlitu atan hman a ni a, mi 600 - 700 velin he hun hi hlim takin an hmang.

☐ **MSSU**

November 19 - 21, 2014 hian Bungtlang South Bial huapin Bungtlang South Kohhranah Sunday School Zirtirtu Training neih a ni dawn a, hemi neihpui tur hian Upa Lalchuanmawia, Zuangtui (MSSU Trainer) leh T. Upa Lalthahluna Ralte, MSSU Asst. Coordinator te an kal ang.

☐ **Kohhran Hmeichhia**

Women Centre, Phunchawng a mi sak mek chu tluang taka kalpui zel a ni a, tunah hian building zawng zawnga aluminium chokut vuah hna zawh tawh a ni a, internal water supply & sanitary installation pawh tihfel thawkhat a ni. Building chung leh pawn rawng hnawih mek a ni bawk.

☐ **Kristian Thalai Pawl**

- ◆ November 17, 2014 (Thawhtanni) zan hian Kanan Branch KTP Silver Jubilee hmanpuiin Leader Rev. J. Lalremsiam a kal ang a, Synod Choir-in an tawiam ang.
- ◆ November 15, 2014 (Inrinni) hian Praise '14 neihna hmun tur Rajiv Gandhi Stadium, Mualpuiah thil tulte en fela a hmun hma buatsaih hnatlang neih a ni dawn a. A bul hnai Bial/Branch mawhphurhna pekte leh chanvo hrang hrang neitute an hnatlang ang.
- ◆ November 21, 2014 (Zirtawpni) chawhnu dar 1:00 ah Synod Committee Room No. 1-ah CKTP Committee an thukhawm ang.

☐ **Bookroom-in Special sale nei**

Synod Bookroom chuan christmas in cheina chi hrang hrang, China ram atanga an chah thlente hmangin Special Sale an nei mek a, zuar chhawng duh tan pawh lak theih a ni.

☐ **Hruaina Eng FM Radio & TV Programme**

◆ **NOVEMBER 14 (FM Zoawi Aizawl @ 7:30 p.m.)**

**Solo** : Debbie - I va hlu em, **Zaipawl** : Leitan Pavalai Zaipawl - Hlimna Zion, **Thusawi** : Rev. Lalramliana Pachuau - Ka chhuan ber Krista kraws, **Solo** : Freddy - Dawn chiang ve la, **Zaipawl** : Besy Choir - Min kalsan ngailo, **Solo** : Rintea - Vanglai Nun

◆ **NOVEMBER 14 (FM Lunglei @ 7:30 p.m.)**

**Solo** : Debbie - I va hlu em, **Zaipawl** : Leitan Pavalai Zaipawl - Hlimna Zion, **Thusawi** : Rev. Lalramliana Pachuau - Ka chhuan ber Krista kraws, **Solo** : Freddy - Dawn chiang ve la, **Zaipawl** : Besy Choir - Min kalsan ngailo, **Solo** : Rintea - Vanglai Nun

◆ **NOVEMBER 16 (TV Programme @ 3:00 p.m.) :**

**Zaipawl** : Muallungthu BZP - Chatuan Lungpui, **Sermon** : Upa K. Zoremsanga - Um Rawh, **Solo** : Luangmual Kohhran Pavalai Pawl - Hmanah Lawmna, **Playback** : Karbi Anglong Presbyterian Kohhran Silver Jubilee Lawmna, **Solo** : S. Lalmuankima - Rorelna dik, **Skit** : Chaltlang Bial KTP

☐ **Susamachar Prasaran Programme**

**NOVEMBER 16 (Pathianni) 5:00 pm. Hindi Gospel Programme (Susamachar Prasaran) :**

**Group/Choir/Solo** : Hamren Pastorate Choir - Vang thu tha, **Group/Choir/Solo** : Hunthar - Pavitra Atmaa, **Sermon** : Lalramzauva - Apne Margong Ka Dhyana karo, **Group/Choir/Solo** : Electric Bial Masihi Sangati Zaipawl, **Group/Choir/Solo** : Zotlang - Sara Zaha

☐ **Moderator Programme**

Synod Moderator Rev. K. Lalhmuchhuaka chuan hetiang hian Kohhran tlawhin hun a hmang ang :

November 15, 2014 (Inrinni)	Zan	:	Champhai Vengthlang North Kohhran
November 16, 2014 (Pathianni)	Chawhma	:	Champhai Electric Veng Kohhran
November 16, 2014 (Pathianni)	Chawhnu	:	Champhai Venglai Kohhran
November 16, 2014 (Pathianni)	Zan	:	Champhai Vengthlang Kohhran